





黃海

卷第

天都逸史潘之恒景升輯

雲栖學人汪茂奇夷仲校

紀游四之二十七

太嶽黃山合評

有引

東吳朱鷺曰萬曆癸丑春二月山史潘景升在吳門

約余游黃山同日發舟山史既抵家省侍余逾年乃

始得至山史恠之余曰吾先太舉游耳大信不必敢

以舉游紀呈笑山史喜曰恒正有意乎太舉也勝孰

與黃山比余游黃山下亟問狀且索紀余曰黃山不



可紀也紀以貌勝勝至筆弗能貌我有貌舉山筆顧獨無貌黃山筆山史大喜曰我固意之果爾耶雖然子之游歷多矣東遡海北浮河西入秦中入洛秣陵之藏具區之蓄武林之兩目鄔郢之寥上豫章之匡廬畢羅胸次都有紀詠黃山獨難一筆耶豈可無說而處于此其爲我略評黃舉可乎余唯唯作舉嶽黃

山合評四之二十七

評曰黃舉並竒骨也舉雄黃秀舉大黃散收雄大行其巔目盪胃開一眺而飽擷秀散踵所至憐心醉魄在在飲人太舉如磊落丈夫氣槩壓羣所少幽致黃

山如文采學士流映四出轉覺多姿太舉如天大將軍身一現而羣魑滅沒黃山如百千天女妙莊嚴相臨凡而冶艷都慙太舉如四天王天分視湏彌頂日月游行出其下黃山如群仙會燕瑤池閬苑三島十洲集其前若乃以杙陟以卽當度猿猱苦之險以成其竒太舉然黃山否也四五月瑤草璫花彌滿峰谷盛夏如春山爲增麗焉黃山然太舉否也太舉三峰确而少理但驚陡上黃山諸峯纖皴巧斲盡可盤桓太舉一石動橫長畝多如覆敦黃山無盡藏石豎立橫蹲備諸幻肖太舉之松僅六七虬柯凌霜上古黃



山之松千柯千態畢王石端不寧唯是太舉三代以前之鎮嶽尊天祠神不供養佛黃山近闢靈區精動三宮輒獲迎奉毗盧如來及十二願佛大悲文殊普賢諸大菩薩一一黃金寶相得未曾有太舉羽流香火高者爲全真黃山皆比丘然誦次亦優漶塞行師普門超然法器堪與微語商向上事一乘師首開師子林爲西偏賢山主游屨至非師林不能安食寢也品量略以陳矣或言黃山有虎跡霧晝月夕不能安步若爾諸勝太舉者此亦足相當要自兩間竒峙未敢于中置甲乙也山史讀評而軒髯笑曰夫亦猶得

紀也又羸一舉遂書以散諸同游同游爲張季黃方若淵若繩往返浹旬八晴二雨適也季黃力疾上文殊嶺膽股俱壯勉之還二方日總雙髻後先杖屨共池浴共登峰共汎雲海共挹攝身光于飛來石旁之攝光塢攝光塢予所命也季後一日上仲先一日下山史潘景升以逼小祥程申之以事宛廊中張韋至以初下帷曹氏館弗偕游繆太質寄聲黃山秋以爲期歲甲寅夏四月之十二日識

又報山史書云太舉直磊落氣可驚四筵不耐獨坐黃山竒秀日出一石一松足了一生足快千古



游黃山題詠

朱鷺

字白民別號髯道人吳郡人賣竹佐游名山孤征無侶

毘盧佛頌

稽首毘盧尊面面相殊勝相七座非紫層四列無背向  
圓滿極光明橫豎徧華藏佛佛從此出劫劫無餘長  
名義融顯密性海表無量以何大因緣黃海獲供養  
比丘福慧力安受三宮貺黃金為莊嚴法寶同馮  
仗乍得扶靈區終今永瞻仰

羅漢級頌

離欲尊者五百示現山級偶苻表以企善奮步無住

越階無羨原無首尾一骨同奠脫下則樂上出而晏  
山史作倡贊以羣彥亡日登登我行斯便厝踵諦思  
出塵石面

初至潘景并有芭堂

黃海昨遺我天都擬即游出門先太舉鶴羽任行休  
歸來六月息一逗經春秋感君猶讀禮慰嘻聊綢繆  
信宿驕倦足償志軒轅丘願得同策杖及此春光優  
雲空六六峰一一造上頭

黃山取道硤中贈程申之

歷茲山水曲攬勝得硤中誰啟物外觀飛閣衡其空



名紀慨前詰美人懌新逢二三自同方濩落來孤踪  
把臂留返景啣杯散昏鐘跌息何所得澈夜聆淙淙

雲空六黃山松六詠

松無五仞高矮者二三尺敷枝或橫或平翠可布

咄咄離奇者石端絕土滋根大于其本短榦特修

高既不盈尋大亦不盈斗霜蘚封蒼膚糾結百厚

突石何嶙峋有起動百尺頂上一松擎神龍厲

有石便有松多從石巔出浸漬但石髓時復霜

一松王一石蒼古看不厭便足了一生蛻骨于

又四首

松饒太古色一峰千榦奇盡從皴罅罅布強半俯

坐觀雲起壑漸見沒崔嵬松頂依稀露分明雲

何處松奇絕文殊曲磴開煉臺東過去始信接

名峰都莫論天女侍天都遙接散花塢松妖一

天都峰前二小突松石特奇陡無陟跡道旁往往

錯過予以飛行法上觀殊快心命之曰天女峰從

其侍天都也

亘史云余於青鸞峰亦呼為天女與白民偶合

警松癡

原不依土生那得遷土活寄語買松癡莫賺人來拔



幽徑

好鳥自閑語竒花與安名同游先上嶠幽徑我徐行

五浴湯池

液濬靈砂出出新古皇洗髓十千春餘波留得常溫

火暮暮朝朝浴保人

光明頂雲海

看雲共策光明頂布壑彌原亂涌濤四望真成銀色

海青青獨露幾峰高

贈普門師

叅方一鉢了無求精動

三宮人豈謀請得如來面

面勝莊嚴黃海納羣流

贈一乘師

生歿尋常不易當牛車擔荷丈夫行黃山西畔聞師

吼羊鹿相驚窟五方

黃山下與方若淵若繩兄弟

黃海一旬游饒中廿日住總饒山水緣搜冥同力驚

心雖各自怡興每雙徵句餘緣尚豐水飛梁話散聚

酒酣筆墨縱夜分披肝素茫茫宇宙濶促促百年步

一臂足千古焉復貪停駐我自歸華廣君自驤天路

再過清泉贈汪夷仲穎季



練水聞十年相懷未識面何意黃山游清泉慰接見  
高樹隱平樓微言薦蒲醺長晝既聯席落暉猶滌硯  
同方兩三人容與誰能倦

餘杭西上抵歙溪得二首以下三首初至作附此

谿山一何宛風日更美焉花香鬱周道竹樹生青妍  
容與故遲步肩輿縱之前計程不及人欵勝從我便  
修澗五千曲泉聲日泐泐高山來春鳴其傍

晨嵐蒸潔雲午風盪野香誰與共領此頽影雙翱翔

豐溪夕飲初晤景升兄并會訥叔卿子餘清

竹方坐豐水溯洄復溯游綠浪牽上下窅波凌空浮

卜夜正新月微歌得纖喉為懽不知足旦約兼段樓

之磴在文殊嶺以三折命之

之磴三折度經松似問竒不從蒼頡製妙運普禪師

黃山贈汪居士潯字浚無偈言

未離諸有涉念自向無求深入乃以出沉鱗水面浮

師子林投住

松看花塢合峰到海門竒日日依師子行游此處宜







黃海 方詩  
余亦巖棲者屐齒恣相逐共了山中緣返憩依深谷  
深谷何透迤主人置茅屋留客有鳴泉日日濺飛玉  
以君丘壑性而一寄水竹雲光任舒卷氣韻流方幅  
盤桓動涉旬惜別翻愁速何以攬君祛烟霞空滿掬  
爲展二游評良友共快讀褰裳如可從期之秋山麓

汪茂奇

字夷仲歙人

予與白民丈神交有年矣來遊黃山乃始識面不  
我鄙棄引爲小友談對浹日頗劇情愜於其返也  
慨然興懷聊成數詠紀事不足附行李也

蒹葭館上逢君日正及林芳未歇時乍見總含塵外

意竹間花下聽黃鸝

檻外簷簷幾十莖一溪流水棧前行誰家燒燭閒清  
夜共把深卮咏落英

時見景升花詠

踏遍黃山六六峰隨雲栖息路長封到來筆底生奇  
氣隔竹虛無幾萬重

高樓長日雨絲絲蚤暮參禪共課詩不厭庭前新綠  
竹較來梢葉轉多姿

無計從君攬素秋寸心還逐洞庭舟唯將姓字依行

李到處應傳慰舊游

予爲君校紀游因懷同社諸子

招方聖功游黃海





原件短缺



聖功僑居青溪歸時信宿清泉今三年矣每一興  
思輒爾拈韻今春老友白民來遊黃海勃然有入  
山志因憶與聖功往日聚首詩畫遞作商略古今  
幽懷頗愜乃所未了緣者此山耳聖功倘有意乎  
同人雷宸父載與俱來吾將褰衣從之矣  
君從澱山來曾向清泉宿北窻枕松風東軒浸脩竹  
探囊無半錢雲烟空滿篋生負曠世姿寄情在林木  
揮毫輒萬言潑墨動成幅亦巖棲人性合耽幽谷  
黃海案間山屐齒未經麓因君懷往事扶筇意隨逐  
良友可招從嚴灘進艫舳秋水以爲期先聲雙魚腹

### 游黃山記

釋性航曰甲寅春余與通源安公浮南海海上人多  
言黃山於是計遊黃山遂買新安權天氣漸暑迺結  
夏仰山俟暑退涼生以八月望後一日偕安公靜光  
次甫四人曉發暮宿商山冠松菴再宿雙溪二宿雙  
嶺明午抵祥符寺出寺望天都蓮花雲門諸峯不盈  
數武寺前過澗卽湯池故俗又稱湯寺泉出硃砂峰  
底或言蓮花峰泉脉所滲池縱廣七尺橫九尺深半  
縱廣蔽以石洞氣勃勃如白雲上升余與安公以次  
就浴其水澄潔甘美香氣如蓮花不寒不燥可飲可



沐殊適倦體安公曰此何異香水海亦當作月光童子觀余曰若作觀時池中砂石自令人心痛應不香海浴罷就繩床卧晨起問途東繇苦竹溪十三灣九龍潭至丞相源西繇湯嶺至白雲菴出鍊丹峰又北歷翠微寺松谷菴五龍淵遂登石筍砭然石砭路稍坦夷但經秋雨路斷不可以揭丞相源登天海路多沙溜亦難步履唯從湯池上數里爲慈光寺又上爲蓮花洞爲文殊院爲鍊丹臺爲光明頂卽天海也是爲黃山南路磴道可攀倦亦可止於是定從慈光上時天氣清朗涼風析析澗中好石羅列道傍如星垂

奕布滿林紅葉雜以蒼翠高峰嵯峨片片色皆紫玉玲瓏照耀芬敷繡錯令人應接不暇加以水聲松籟猿鳴鳥語響答空谷如鼓瑟玄宮張樂洞庭如百千天樂一時齊奏因踞石默坐良久停午至慈光寺寺舊名硃砂菴普門安公於中煉魔相從挂錫五十餘人糧絕皆採山藜飲澗泉月餘不散苦行彌篤後普門詣京師感異緣得欽賜藏經滲金四面佛始勅慈光寺名余謂普門莊嚴依報宜亟圖之因問山中菴基曰吾行脚時曾夢到一山其間三峰錯峙宛成天巧如三大士像以文殊爲主今於此山得之足



異也因名文殊院子盍遊之午飡令一行僧引道登  
 十里許道中大槩不異初地但愈上進則眼界愈遠  
 心胷愈空濶爾行僧謂宜先至蓮花洞今文殊院未  
 構成先遊文殊下宿蓮花殊便復折入一徑石壁叅  
 天下臨無際絕壑路斷橋以獨木雖天台石梁莫險  
 于此穿數洞洞外怪石林總錯落小者如羊鹿大者  
 如象馬如定僧立如仙人臥如龍蟠而復委蛇入谷  
 如獅伏而復蹴踢迎人石上奇松盤折詰曲蒼鬱披  
 離俱可千歲白雲橫空苔蘚滿地行二三里果見天  
 外三大士俯引接人如普門語無異登院趾背負危

峰面臨大壑千山環立高低突兀爭入檻中方廣可  
 廿弓膚勝於骨大抵黃山以骨勝而獨此地土色潤  
 澤無纖沙石前一石塌臨崖有跣趺坐跡安公即坐  
 其上靜光次甫亦坐予獨不坐蓋天生靈跡以待異  
 人久遠劫來亦嘗有大善知識一念萬年潛踪隱跡  
 於此世何足以知之日晡尚戀戀不欲行行僧促下  
 蓮花洞天色既暝不能覽洞中之勝唯聞水潺潺聲  
 一僧肅容如無門師余疑至無門洞茶話黃山勝最  
 悉天明看洞前石筍高數丈朝霞橫空遠映峰岫復  
 遊左右二天門亦奇跡也仍出舊徑過雲梯登大悲



頂大悲菩薩亦上賜滲金像院趾不大稱普門欲移之未得善地時光明臺一僧過因同登臺其下千峰羅列上平坦空濶最宜月下經行舊傳黃帝與浮丘容成輩煉丹於此又名丹臺繇臺登天海蓋黃山極頂也東觀天目西瞰匡廬九子諸山皆其餘枝剩脉長江隱隱直縣一線時白雲從東忽湧徧滿山谷如兜羅綿世界巖巒藪澤樹木叢林盡皆一色安公曰此其所以爲天海乎倏忽晴霽夕陽散天紅霞遠映世界復成金色予顧安公此其所以爲天海乎天無形而海有形今以雲爲水以天爲海雲之來也天

因以名海雲之去也海卽以名天卽無形而成有形因有形以見無形此天海之所以名乎靜光曰此地宜建一梵刹行僧曰此卽心月初結社所也今竟一荒地已遂至後海入光明藏口卽光明頂下也靜主爲智空空貌奇古望之知爲有道適丞相源寄公亦在因止宿夜譚智空多古德機緣語寓安多教意俱非徒守空山者明晨蓮花峯靜主招智空寓安茶話且謂蓮峯尤勝文殊唯孤險難登爾余初興亦豪舉欲登蓮峰及過丹臺至大悲上雲梯足力旣疲興亦闌矣余謂安公汝三人登峰頂吾於此瞑目靜坐可



盡收山靈之勝次甫亦倦唯安公靜光偕智空寓安  
 赴蓮峰招余與次甫坐雲梯上遲之有頃安公靜光  
 下誇峰頭之勝傲予以未至次甫謂吾於雲梯見白  
 猿子亦失之予笑曰見固無小大寧作得失觀耶遂  
 下慈光寺普門邀予同佳此山予許以異日安公謂  
 吾於是山十未盡其二三當重遊結茅以居明早出  
 芳村宿石壁山下再宿楊干至巖鎮止中山菴訪潘  
 景升郝公琰諸君縱譚黃山之勝按黃山高四千仞  
 延亘數百里踞江左上游其奇勝實甲天下然名不  
 表於封禪事不載於史籍幽人隱士亦未嘗止薄其

故何與夫亦古今之綿邈天地之寥廓人於其間若  
 馬體毫末太倉粃米固無能窮無窮極無極耶吾於  
 此悟本妙明中其奇絕勝妙固非常情可窺其萬一  
 者是後也又寧獨覽山川之勝而已乎亦衲僧之遊  
 也因紀之

游黃山詩

釋性航

字旅泊京師人住棲霞寺

仰山曉發

侵曉芒鞋踏嶺雲夜來禪榻夢軒君松枝露滴飛山  
 翠竹影風翻散水紋靈鳥繞衣如戀友愁猿傍錫未



離群遙遙百里瞻黃嶽煙雨霏微莽不分

秋日偕安公靜光次甫遊黃山

策杖探幽去涼飈八月時占雲尋好石落葉寫新詩  
幾處靈蹤閱千秋勝事奇黃山招隱士拉伴拾瓊芝

問宿

日夕倦行後崖壑黯黃昏前路訊樵子五里至松門  
纖月露林麓草閣枕山樊竹樹冷陰翠巖巒照水痕  
澗聲徹夜響山叟靜無言罷頓聊足息不寐待朝暾

雙嶺

行盡青溪入翠微一叢煙樹敞蘿扉山僧舊日居南

嶽四十年來不肯歸

山行二首

峯頭霧破亂山生翠嶠丹梯策杖行過水忍看人影  
靜穿林又聽鳥音鳴雲封半嶺留蟠髻瀑挂懸崖作  
吼聲稍倦便登巖石坐每逢空澗愜幽情

嶙峋幻出紫芙蓉霧鎖雲吞六六峰奕布澗中翻好  
石虬蟠巖際寫蒼松路危山壁橫孤木磴險人行桂  
短筇日暮欲投精舍宿蓮花洞裏出疎鐘

慈光寺贈普門安公

綠字丹書下翠微皇恩浩蕩錫銖衣寧無令譽騰



方外先有芳聲動帝畿萬古空山開薜荔十年窮谷採葑菲煉魔堂裏猶存衆土屋茅簷共樂飢

蓮花洞

攀躋十餘里徑拆下平沙洞冷松根瘦峰低石脉斜泉鳴山說法雲散雨飛花中有一僧住峨嵋是舊家

容成臺

丹臺遙見紫霞封欲向容成問舊蹤鼎內瓊漿流亂壑雲中仙仗削群峰猿啼絕壁驚僧定葉響空林間曉鐘昔日軒皇今在否曾聞此地御飛龍

雲門峰

遠望雲門峯雲烟千萬重不知峰頂路還有幾人逢

光明藏贈智空靜主

二十年來不出山花開花謝松關巖前多少菴居者乞食王城總未還

遊黃山寄昆上人

黃嶽挺諸峰寒雲面面封徑微開蜿蜒山瘦削芙蓉古洞尋僧住深林布鳥逢昔年棲隱處潭下有龍蟠

秋霽天都好巖巒雜錦鋪黃花叢碧水紅葉亂青梧萬壑風鳴籟千林月弄珠同遊多勝侶怪爾不能俱

宿中山菴



十日追遊興未闌千峰踏遍薜衣寒中山夜宿饒清  
夢猶向巉巖水石看

釋如安 字心怡淮安人住通源寺

仰山早發

林翳難知曙谷幽聽曉猿繁霜拆黃草殘月露纖痕  
振策踏巘嶺回首迷雲藩窮年恣探討奇勝孰可言  
濬潭奔激溜宿鳥向林翻巖壑情無數戀戀出山樊

秋日偕航公印公次甫游黃山

選勝期秋杪擔簦淨侶從巖寒班野菊洞僻秀雲松  
梵刹藏丹壑諸天迥碧峰行行迷去逕樵子授靈蹤

問宿

日殘寄宿乞山叟環堵蕭然何所有一夜潺潺流水  
聲披衣數問天明否

雙嶺菴午餐

午食投雙嶺幽棲日乍移打窓鼉落菓啼竹鳥巢枝  
童子授香飯園丁薦野葵出門携杖去遙指數峯奇

黃山道中

六六芙蓉天外看滿天秋色好盤桓霜林紅葉非關  
染煙壁青霞自可飡幾踏嶺頭草屨折頻迴谷口衲  
衣寒明朝更踐天都頂乞取軒皇一粒丹



慈光寺與普門師話舊

何處覓招提慈光望欲迷嵐煙環左右峰影寫高低  
 溪午僧方定林寒鳥亂啼相看藜竹下翠色過塔西  
 不憚攀躋險千山訊翠微金襴頰內帑玉杖出宮闈  
 我厭風塵老君耳泉石肥跣趺譚往事嶺上片雲飛

文殊院

身與青霄近蓮花襯足行坐松驚石墮倚杖看雲生  
 鑿谷通幽逕梯藤入化城前途多妙境莫着戀山情

蓮花洞

洞似蓮花石似霞可中不滿一袈裟前臨衆壑深千

尺時吐秋雲釀雨花

雙峯壁立插堦簷坐對嵐光手自拈崖上流泉飛屋

下人人盡道水晶簾

容成臺

容成不可見唯剩此臺名莽逕伏丹竈空潭浮若英  
 千峰無鳳吹孤嶂但猿鳴蕭瑟秋風裏遙懷緱嶺笙

雲門峯

側足攀蘿度石關巨靈何日擘崖間此中只許僧飛  
 錫常伴孤雲共往還

光明藏贈智空靜主



半陟蒼苔印虎蹄數椽茅屋亂峯低好雲每傍間僧  
住短杖頻探別壑迷石榻蒲龕消幻夢松風蘿月伴  
幽棲一生巖下忘心境却憶圓通拒綠緜

楊干寺

山情留客屐寺挹晚峰開爲戀林泉樂頻隨礪水回  
溪聲雲半捲樹色雨中來喜得逢僧語檐前日又催

黃山歸過中山菴宿林公房

荷衣竹杖看山歸袖得蓮花片片飛日暮遙尋踈雨  
後一聲清磬出蘿扉

釋海印

字靜光住仰山

問宿

萬壑秋林映落霞山村野店亂歸鴉道人夜借峯前  
宿臥聽流泉望月華

登蓮花峰

縋石攀蘿上碧峯千山獨讓此爲宗高凌霄漢收羣  
象時有雲光片片封

山中懷民逸居士

六六竒峯插漢中秋霜翠壑點斑紅攀躋盡是東林  
客不見遺民間遠公

宿中山菴



黃  
安詩  
萬曆甲寅  
藜杖芒鞋踏翠巒歸來飛雨濕衣寒中山借宿珠林  
靜紫玉峯頭夢未殘

六六程明仲

字次甫海陽人

宿蓮花洞

與居士

一宿蓮花洞飛泉映壁清枕中風乍撼夢裏雨常聲  
怪石松孤結竒峯雲四生高僧偏愛客煮茗說山情

雲梯見白猿

雲梯高峻接青峯上有白猿啼古松恍似仙人鏤碧  
玉漫疑飛雪未消融

石壁山下遇雨

青松紅樹夾雙溪幽徑陰森聽鳥啼細雨和雲洗幽  
竹萬竿搖曳碧林西

中山菴贈恒一上人

探竒纔出莽林中處處青崖老樹紅日暮欲投僧住  
宿山腰結屋有支公



寒山題辭墨首文公

彩音錄出茶林中讀讀青皇老樹終日暮翁對曾封

中山恭節可一士人

竹萬竿詠史學林西

青公珠樹夾雙對幽登劍來朝長細露雨味雲去幽

黃海 卷第

天都居士潘之恒景升輯  
寒山居士趙宦光凡夫校

紀游四之二十八

暑游黃海紀

敘曰陳眉公嘗稱其郡人顧山子具豪俠之骨山  
水之興博雅之才其才每以藝掩耳山子固擅青  
烏術日為郭璞後身凡兩來新都俱冒暑游初稅  
蓼莪軒即快覩幻扈閣迎佛異景矢身供黃山役  
亦藉聲三吳閒茲夏來一無所詣直覓黃山道賈



勇往余病不得偕則屬羣從于襄隨其杖屨第暑  
雨虞之入山五日皆逢澄霽獲躋天都之脊摩蓮  
華頂沿海子之郭而下諸位置若指掌而區畫相  
度如鑿渾沌如談碣石如圖三都令人恍然如攬  
化人裾又如規未央如較上林如程凌雲何其志  
于寥廓游于縹緲而精析于微茫也山子之志將  
託技以顯余益歎其俠骨之有所施并載之以爲  
左券萬曆乙卯夏至日

顧諛曰癸丑春從宣州將游九華遇一異僧語余黃  
山之勝且空暑游詢其故云山深沍寒四五月草木

開敷鳥鳴猿嘯天朗風和午猶單綃夜思挾纊眞清  
涼界也子當三游此都而緣始畢余頗訝之一游可  
畢何待三爲立夏後始至歛訪髯公潘景升于巖鎮  
苦雨委頓百日不得發僅逢幻扈閣現靈境讀黃海  
游蹟而神往焉乙卯夏首再訪幻扈閣致趙凡夫標  
額肩公書寄景升屬倡慈光佛緣無因眾靡且以相  
度委之山子雖僻處東海且樂觀其成會蜀禪師佛  
乘自黃海來詫余以蓮華峯頂及仙橋月塔之勝余  
爲色飛策杖將往髯公命姪于襄從傳檄山中令豐  
隆清道以五月十九日冒雨行逾佛子嶺而霽度山



口觀黃亭卿雲擁扈天都如觀蜃市余布衣草屨遂稱謁帝小臣或前身從鳥號而墮未可知也二十日晨起甫離芳村見蓮華峯焉見雲門焉而軒轅彌近矣扞湯口爲賜佛寓宮迫視紫磨金光僅藉把茅蓋頂遺書髯公誰當任其責者進祥符寺浴湯池遇恒心上人問慈光寺指兩道西徑平而迂南拾羅漢級五百險而峻且歷茶亭山門故勝則髯公所命也乃北涉攀級上睇眎蓮華菴與丹井藥銚之思于襄已登脊而呼余矣脊爲朱砂水所注白石坦如可跌可漱可樂而忘飢援藤宛轉得闔石欠身過之插槿

爲籬茨壁而蓬戶者慈光寺基也金碧縹緗珠瓔寶珞袈娑布地鉢杖成林輝煌几案間普師所膺景命也朝鐘夜磬疏板枯魚梵音雲屯魔塲火聚羹草茹麩臥薪結鶉而不散不惰者禪衲之清規也余歎曰慈光寺其興于普門乎可稱第一叢林矣測表旣周秩秩有成說凌旦披霧而登海子廓如定空了然俱從因髯公檄而欲親承以報普門爾時陽鳥漸升林緇如沐陰岑涼瀑覺絺衣生寒有鳥自林端飛出聞佛號起應呼而至從人掌攫食徘徊高翔此何靈鳥哉西蜀峩眉山佛光將現則佛現鳥鳴何必見佛



光乃驗也循老人峯背出其頂始踏天都峯麓則山路岐矣中道穿蓮華洞而近其旁新出者爲文殊院左趨天都峯右趨蓮華峯再岐而入海子乃從其近者先揆蓮華洞有姓僧靜菴居之值其他出石竈中煮泉一瓶麩飴四餅分食之以果腹目爲佛餉沿舊徑上文殊院諸奇勝詳山史所紀不能贊一辭僧水齋者棲此絕粒三年刺血書法華經方竟將于六月六日然指作供以報佛恩余敬禮之上人旣作水觀不可以六月息乎出岐道而左左乃陟天都道道未平治眾頗難之而廓如定空固從普門師登頂者往

沙壅積而石骨露可超距行今梅雨沙汰石滑無以畱足惟采山人能飛躍勢不得少稽請腰余以縞若負劍若佩魚挾之百步余橫目曾不得瞬氣塞而魂實矣于襄亟呼止之二從皆跪觀音石而泣縱令得仙安足豪哉乃舍而右趨蓮華峯不知仰而升者幾百仞忽巨石如龜當道似無可通攀援百餘武始得罅入折行而洞豁如也又三折窺圭竇窮複徑而啟一門轉危崖跨二磴爲結穴處廣與飛梁接廣不踰咫其脩凌虛無敢乘之而下視者自此望峯頂有石瓣二如墜葉飄空倚丈水而梯之若綴絲山泉激其



趾如歎玉皆浮動而輔枝搖搖也越而踵慄慮退縮之難喘而勿升則功虧一篲向髯公賈余勇矢登二頂以還今一怯而再卻不爲前人笑乎卽奮而失足亦且爲鬼雄遂畢登與于襄誇健勝指顧羣峯皆竄伏僅天都差與比肩安得拍而狎之以驕壯夫則力援孤松剝寸蘚紀山子至三字而下滿志煙霞託宿師子林如丹臺海門不足當一盼也廿二日登石筍砭頗懷棲隱志訪智空師不遇遙睹林莽中一壑定爲高人踞之廓菴云此名旃檀林卽隱空師所開余亟過從其人與地俱愜所憶上峯曰寶涼下峯曰象

皇俯仰皆呼引有情度石鼓觀赤線潭卽黃帝揆玄珠處隱空贈余靈杖爲別遂東尋丞相原下白沙嶺如浮水而馳扈擲鉢菴宿古心上人房支木爲牀取諸玉蘭樹根其光可鑑也令眉公見之不大稱快耶經九龍潭泝苦竹溪與于襄別于湯口余再浴湯池問淨林居挹白龍潭飛濤觀山門雙瀑髯公狀爲圓水知言哉反慈光寺而天始雨若從雨隙中游也甫就枕夢異僧諭余曰子有宿願而不遇普門胥後游矣余憬然覺旦日辭廓菴定空了然三師泊華嚴鍊魔兩堂諸禪友且計然指良因出山門逢堂侶放參



挑苦菜至者皮積如山毛以當餐不二食盡矣宐髯  
公爲聚糧憂苦也廿五日出宿芳村廿六日走曹溪  
道宿開黃里廿七日會空如于壺山菴廿八日歸幻  
扈閣作記廿九日呈于法華壇中髯公爲作序倩佛  
乘師手書以副黃海歸質之眉公必三反而後竟余  
志也

亘史云述蓮華峯如行羊腸九折宛轉殆盡可稱  
良史筆矣

### 測山肇蹟

顧諱曰土乃龍之肉石乃龍之骨水乃龍之血苔蘚  
乃龍之膚草木乃龍之髮黃山之勝有肉有骨有血  
有膚有髮具體而巧鏤空且尊所尤稱美也膚髮婆  
娑點綴卽懸崖絕壁皆出天然血取清甘香潔真不  
異廣長舌相骨格稜崢嶸嶠嶠頗堪餐英屑玉之資肉  
色青紫界天紅白澄水乳砲兼備乃得鋪氈展席之  
勢如此山靈豈凡眼能識近爲馮司成公指出普門  
師實藉爲開山之基今以所定朱砂菴欲建造

欽賜慈光寺址諱於乙卯年五月受居士潘景升教



來游此山歷諸勝槩細測方向值普師甫出山而馬  
中貴來諗復

旨于

大內時有堂主廓菴定空恒心等一一引陟占得殿  
基還空在舊開上層收亥脈作壬山丙向則龍虎均  
齊輔翼輻湊坐得中抽朝山專對而水口亦合法矣  
一切分金刻度容當配日合時而定如鍊魔場空在  
西北有一枝嫩脈發下此甚得所理空亥山巳向兼  
壬丙三分山門殊有蹉峩大勢正空貼對白龍潭今  
欲暫栖佛寓開茶亭之址乃羅漢級石脈青龍逆水

之砂若厝砂頭似防水患第恐大殿未遽成亦當擇  
其旺蹟乃急務也必須就羅漢級左獻出平坡之處  
鑿入丈許此得天都主峯第一枝真帶鱗帶甲之脈  
卽非孩兒結頂亦是上分下合香火自當隆盛至于  
藏經閣空在本處與殿脊爲鄰極稱合法無庸別議  
若所指普同塔窩乃老人峯鳳形大盡閃此奇穴且  
到頭有脚有口理空坐乾向巽庚辰庚戌分金東北  
石臺空構一榭爲施食場猶全局也自普同塔窩進  
里許有石指三四形如佛手余題之曰佛掌巖茲乃  
本山最上乘靜室狀其峯隈石抱徑僻泉環空普師



自結團瓢猶為妥當合至人棲也由黃土嶺南二里  
 有一小支磊落而下兩曜凌空砂盤水繞胎乳垂而  
 有情徑路分而無礙前有天生覆鍋金形成胎作案  
 外朝蓮花菴主山峯頂此空作癸山丁向子午分金  
 正得天皇正脈實封拜血食旺子旺孫之靈蹟也或  
 以白衣大士或以玄女天尊或以軒轅黃帝鎮之其  
 後叢林大興俱賴有此若塑白衣像應胞胎案脈為  
 求嗣者響應亦一說也然上二跡皆形家之言恐不  
 足憑俟海內高明登覽將朱砂菴殿宇房室陳列則  
 上呼下應左盼右顧便知真境靈區乃遺珠一蚌為

山子剖出矣乙卯六月朔錄于幻扈閣中

詩

顧諤

字山子華亭人

老人峯見異鳥

草衣三四侶松頂步晴山佛鳥光音界人天法喜關  
 蜀魂長夜泣隴夢幾時還不及青蓮舌曾歌雉子班  
 登蓮華峯絕頂下息尸中

孤筇陟頂峻而安倚石扶雲縱眼看露滴森林晴亦  
 雨陰埋列岫暑猶寒呼猿不假騰空力駕鶴應知汎  
 海難只有神僧飛錫處招提遙指近青鸞



煉丹臺

指月升孤塔危峯住一家時時生海浪月月有山花  
 奔大癡老癩画不出  
 閒吟丘壑訪高踪師到何方錫挂松天鼓沉沉青籟  
 遠野夫無語嘯前峯

黃山歸東臯荅客問

怡情山水獨徘徊蒲袖煙霞世外猜五月猶寒材酒  
 淡沿溪無路野花開移松就日標孤影出土分空認  
 劫灰賸以暑游誇示客曾從雨隙過黃梅

贈言附錄

陳仲醇送山子游黃山秋水簾前清更清何人賣

卜此藏名得錢即入深山去不肯騎驪向市城此

余贈顧山子詩也山子隱居西湖讀書好道喜接

四水雲霞中人黃貞父諸公皆雅重之山子曾遇

異人授以青鳥家言皆曾楊廖賴秘傳向人指劃

吉函多有奇秘今游黃山予復贈以詩云繫絆芒

鞋未肯休月明踏破碧山秋自從傳得搜龍訣到



處能教石點頭

董玄宰云山子有新都之行寄黃山圖以貽之若  
把臂入林也又贈詩云芒鞋踏破萬峯雲手定青  
囊玉髓文茶磨山頭來夜宿何年黃海更逢君

眉公復題云十步一雲五步一松松埋雲上雲  
松中誰引子兮山有猿誰乘子兮潭有龍

趙凡夫云山子居士游黃山白岳天台二薄訪匡  
家兄弟遂述其勝令人色飛不及爲言以寄神往  
聊錄舊詩贈之儋簷躡屩意條條問水尋山道路  
遙記得虎頭奇絕句轉深轉遠轉清高 朱白民

邂逅山子有黃山之游用凡夫韻爲贈風色正條  
條千山林屨遙搜龍形自獻得句意偏高 湯嘉  
賓送山子黃山選勝高著擔肩短著筇石英泉液  
紫烟重踏山萬箇峯如屑擬選黃山若箇峯 施  
羽王云山子有黃山之游賦贈眼底乾坤不住身  
看時山色問時津逢人得意惟詩句袖裏青鳥秘  
鬼神 馮鑑之詩云柳色縈絲鬧晚紅正堪描寫  
待良工獨乘鶴艇中宵月試着荷衣野渡風滄海  
浮杯何限醉高峯刻句定爭雄欲憑寄興黃山上  
得趣應知念我同 陳居一詩云篋底曾收五岳



圖重游黃海試青島名山乞得神仙訣寄取乾坤  
 在一壺釋蓮如詩云輕雲淡淡水滄滄司馬長  
 游趣早凉若見骨山須記取他年我欲搆僧堂  
 黃伯傳送山子夏日游黃山予昔逢梅雨淹留佛  
 子家日中仍挾纊春盡始開花陸海雲爲浪丹臺  
 霧變霞不迷頻去路藉爾指南車潘景升云顧  
 山子再至新都乃冒暑登黃海歸有紀詠賦此贈  
 之總爲塵緣絆非關勝侶稀閣應同幻住身可挾  
 山飛興遠期靈運文深避陸機巖棲何待卜昨夜  
 夢先歸

黃海

卷第

天都山史潘之恒景升輯  
 石雨道人方士翊若淵校

紀游四之二十九

黃海游畧

薛正平曰余與子玄訪髯公於東臯髯公目送之笑  
 曰三十六峰贈子杖頭去矣容成臺彷彿得之烟霧  
 中再越宿而至湯院風日晴美步白龍潭錦溪踟雪  
 真別一世界遂宿慈光寺普門老人尚留燕邸以不  
 得問偈爲恨子夜披衣則嶺頭霜霰如殘月是日大



雪不止予謂無恐山靈必許我輩放眼詰朝果清霽  
踰數嶺皆鳥道雪深數尺碧空無際冰花繡樹朝陽  
燁映使人一步一稱快從亂石攀緣而上斷崖千尺  
峻坂紆折下臨萬仞賈勇飛度徑窮復穿石罅中聳  
身上望劃然洞天是爲文殊臺峯巒森列虬松古栢  
蒼秀刺目山中第一佳勝也轉至大悲頂石棧千尋  
有老僧踏雪中負擔挺兒取短杖代爲肩荷了無難  
色余顧謂孺子可教凌晨飯迄登蓮花峯其險過文  
殊臺而勝亦過之怪石怒起數十仞如蓮瓣中有結  
茅我當燒絕棧道卽此作活埋菴可了大事平天砭

亦峻絕石上靈松高二尺蟠曲如龍秀頂如蓋當是  
千餘年物余笑謂雖脫祖龍之辱不免俗漢摩頂奈  
何又留山中兩日一宿後海一宿獅子林從海口曉  
望下界白雲數百里一片明光錦仰天叫絕取故道  
浴湯池而歸自小春廿七日携屐至出山則一之日  
已越七宿景升先生見余輩雨中來掀髯大笑值先  
生囊空典一漢爵沽酒快飲我友俞彥直黃介子錫  
余皆有勝情衡公蕙道人皆有奇僻惜不偕來聊紀  
時日以貽之至峯巒巖壑之奇則備載髯公黃海志  
無煩余言也



又云余憶眉公有言昌黎能開衡山之雲不免華山之哭大抵到此非大笑則大哭余每遇一巒一石必爲絕倒因語子旭挺兒曰坡老云不識廬山真面目只因身在此山中山之靈趣須出世人始能飽領若逐兒童之見數數尋形似與俗子啗酒肉無異子玄深以爲然時馬中貴奉旨飯僧衲子畢集余畧勘過有一關中僧服水三年遂稱水齋和尚燃指刺血余問如此了得生死乎展手云死生在何處余問一口吸盡西江水如何笑曰勘柴漢不會佛法獅子林有一新到老宿霜頂皓然神彩煥發指拄杖問云還

有的的大意麼余曰只是不開口承接得人大肯余言有一道者年甚少風神清遠訊之則書生王應辰髯公里人也余來山中所遇寥寥爲之深嘆大雪中山花半已作蓋僧云四月時來遊異香滿石余因發一妄想人日後從光福看梅遂渡洞庭看梨花轉登銅官看杜鵑遂至吳興採茶啗筍此時政當清和當踏徧黃海三十六峯歸至武林喫楊梅便過天台石梁避暑雖未能爲五嶽遊亦小小結山水緣耳并識之發髯公一笑

游黃山詩



薛正平

字更生華亭人乙卯冬至山

方夢暘

字子旭華亭人更生高足有和詩

薛挺

字紫檠更生子有和詩

紀夢

醉踏天都虹狂歌拾靈草明月入掌間玉杵半空擣  
 忽歸唳霍里酒氣撩軒紫椒漿壽阿母石鼎焚栢子  
 共歎歲月除兒童喜見齒偶檢明光書短劔提不起  
 長袖掩面啼餘涕驚同被潺潺水聲喧愁聽寒溪雉  
 響潭  
 憶我軒轅時蛇骨南山鬢珊珊有餘響劫火不能燼

變為玄牝谷微笑亦空振當招蘇門翁水潮千尺歎  
 當携華亭雀高航戛孤悶嗟余廣長舌慧業今來鈍  
 哀歌咽冷風蕭瑟不成韻願化天公耳低聲思借問

夢暘

和

蕩舟絕壁下悲歌破山腹疑有凌波人笑語紛相逐

挺

和

曾躡玉山頭振蹠飛空響泛泛寒潭曲醉呼出仙掌

黃山道中

石齒疑殘雪寒流萬竹中短筇拋石上或恐化  
 龍  
 負暄溪上石笑望青鸞峯婉衿舊時曲猶響白雲中



慈光寺遇雪

滿地香雪掃不去丹砂飛作葉珠燈湯池浴罷臨風  
嘯踏破龍潭五色水

夢暘

和

夜半狂風驚客夢短松謾謾不勝寒未問天都可登  
否峰頭殘雪已堪餐

挺

和

不見寒山月不聞寒鳥啼蕭蕭香谷裏寒林帶雪低  
自天都踏雪經文殊院至蓮花頂

瘦骨從來挾紫霜曾經化霍供支郎赤脚仰吞丹灶  
雪掃盡寒霞倒景旁膝闕插空紅玉磴肩摩劈脊白  
霓腸冰髯吹風觸松爪凍客怒臂驚羚羊日出千峯  
擁天碧日落迴波大海黃匡廬瀑布九子額出沒朝  
烟與夕陽不特腑肺大洗滌亦使眉目生妙香生平  
壯懷差一快速歸謀聚五岳糧他年縱從碧落去留  
取天都置石牀

出山

只恐狂呼驚玉宸千巖殘雪翠華新還將三四逃禪  
客來洗蓮花一點塵

黃山冒雨步至髯公有芭堂



湯池浴雪來帶染丹砂汁新漲憂寒烟怒雨摧花笠  
芒鞋苦不堅短杖挑雲入座客驚遠人紛拏倚柱立  
髯公笑而迎酒鎗俄相集逸興老更豪夜夜鮫人泣  
禪心寄花枝月華帶霜裊硯掃天都雲囊空豈羞澀  
薛自跋云南屏落木終夜不止忽憶歙州諸友欲  
遂了黃海之願客謂此時積雪迷路大霧累日不  
開須初夏爲宜余意醉浴湯池臥看天都飛雲猶  
勝訪戴人也叔服子玄聞余來甚喜子玄欣然裹  
糧賈勇偕往余初疑晴與雪必不兩得不意入山  
遂大雪雪後卽大霽屐齒雖未徧丹崖翠嶂無不

與余目成亦可無憾余行時止生以同燕雪看紅  
葉詩見投并爲余治裝迨余黃山歸髯公携酒溪  
樓聽雨若淵百孫相次把袂挑燈細話適燕雪在  
座出止生別扇相示亦良可念具人以長至爲佳  
節癸丑至日寒月空冷余與彥直飲拂水是月哉  
生明亦至日政與子玄坐嘯蓮花峯俱大勝緣至  
歸而與髯公快談三日夕覺三十六峯俱在髯公  
腕頰間又一大奇也

余嘗念入名山必胷中無一點塵始不負山靈踏  
雪黃海每過一奇峻我師必指示此似某文此似



某畫此似某偈此似某古德轉語復笑曰無乃饒舌如此品題真大開胸眼得登臨佳趣亦使余輩知造化之奇幻無盡不惟繡出鴛鴦并將金針度人矣弟子夢暘記

大抵黃海之峰雖以險怪為奇而森秀峻潔顧盼有情令人望而可親黃海之松類生絕壁石罅上盤屈萬狀非人間所有黃海之石膚麤而理潤故日色所射徧作紫光湯池下皆丹沙故水獨甘芳清滑甲于天下真地肺之靈區也男挺記

方若淵評云更生跨華亭鶴看雪天都巖壑之姿幽冷之韻應使山靈虛席

讀黃海附家季游畧後

薛鼎輔云家季更生以乙卯冬仲衝雪遊黃而予亦以是歲臘盡赴新安吳泰徵之約值雪甚上下積素中光搖徑絕雖身在畱畫而困躓極矣泰徵訂以春首踏遍三十六峯然後從山僧乞一袈裟地掩關相對宴坐徵心奈泰徵應其尊人召馬首遽北囑予堅待今屈指八閱月矣青葱宵靄時入夢思而良晤未諧勝遊未果讀髯翁所致黃海不禁心熱夫曩予跋涉原為靈區賈勇乃今尚屬神遊山靈當笑人俗然泰徵雅有遊癖予故不忍先之雖秋光已逝然霜巖



水結木落山空真骨堪把終當杖策被毳探奇於罝  
風凍霧間膚皴指坼以酬名勝也書之爲異日入山  
左券時丙辰九月一日

詩附錄

薛鼎輔

字台仲華亭人更生之仲兄

景升社丈出示天都峰頂張幡燈詩用原韻

奉和兼遺家季

遙想天都最上峰將馮孤影得追從雲中冥見棲松  
鶴潭底清游陟鼎龍南望一星宣瑞氣西來五葉振  
禪宗也知華藏同緣者不爲天親愛所鍾

黃海遊記

乙卯十月更生從湖上買棹邀予看雪黃山予時夙  
痾初起尚苦寒更生興特豪宿齋頭兩日廿七晤潘  
髯東臯髯公語黃海張甚足爲遊客破風雪是日抵  
容溪曉行微霰道中竹樹叢密石壁往往從樹影出  
白石樾樾亂澗水中如皜月照積雪令人骨體清絕  
恍恍非復人間境廿九抵湯院讀羅文恭壁間兩絕  
徘徊久之取道白龍潭潭水澄碧如鏡道多奇石類  
散步瓊瑤中顧盼不暇暮宿慈光寺寺開山爲普門  
師師時寓燕以不及問法爲憾詰朝雨雪更生偕予



黃海 方記 卷二十九 萬曆乙卯  
姪緒遊興倍勇擬踏雪天都以衆畏險而止二之日  
雪霽從鳥道上壁峭如削怪木多出危石巔於時旭  
日初朗峯巒與雪色交映覺奇秀來逼人欲奪目睛  
快不可狀薄午謁文殊院院踞絕險石徑多斷絙木  
始得入每歷崎嶇仄裂處輒怪石怒起疑如遊客予  
意或山靈閔惜不欲令塵侶相溷轉入險極忽別露  
一洞天又若主人引客不入窮深不止殆長公所謂  
河豚真可博一死也且從大悲頂踏蓮華峰峰巍聳  
直出天都上俯視勁風掣雲多在山趾旁構小苑爲  
普門師習定室余笑語更生吾黨訂入山緣當無踰

此者俱戀戀不忍別去復由雲梯詣平天砭諸峯怪  
態百出有筍矗者屏列者戟張者或絕壁複互深窈  
中隱隱藏一世界游侶俱大叫謂此中必有老僊憾  
不及爲細搜索砭頂多異松其一宛轉蟠紆可供梵  
士跏趺色更鬱古不識何年物或飽餐烟霞狡獪所  
致不可知耳從砭頂望三天子鄣列如拱揖匡廬九  
子秀色雲杪相向豁然快絕時餘雪未消僧屐罕至  
道中雪幾盈尺而徑路稍舒步雪抵黃海曉登海門  
雲氣蓬勃九州俱在積水僅天外一兩峯明滅可數  
少頃四顧卽茲山亦一漚浮海水中予曩寓南粵觀



海絕嘆其奇若空明瀕洞此又類大海中三神山即更生家並海上至此亦縮舌駭異正不知當作何等贊嘆耳四之日憩獅子林以風霧惱客為出山計越宿浴溫泉乃歸

方一藻曰予宿黃海嘆宇宙山水奇不可盡又嘆山水之奇決盡於黃海他山即詭異秀特圖經方志可載騷人勝士可咏歌至有賦咏流傳山水寂寞者可笑也黃海自軒轅迄今竟未能加一語擬一妙即今遊履日夥就眼識所到大都已不可形容其不可到者曠劫未經賞識即千百年後亦必無有賞識者真

奇固造物所吝必世人不可到不可識也直恐軒轅亦未問津矧余輩漫游未及二三輒哆口談黃海不幾令山靈笑我雖然不可令潘髯驕我自今發一弘願願以今生願力載萬卷臥遊茲山更乞分普門大師半席俟綺語業盡余誓不敢出一語累山靈茲特為山水一瓣香並作他年住山公據

游黃山詩附

方一藻 字子玄歙人

巾駕陟靄岳振策凌紫虛逍遙揖列仙瀆澆接蓬壺怪石蒸層雲碧巘倚精廬仄徑磴屢絕連巖望轉舒



虛疑造化苦神腕幾雕剝平生五岳願夢想結良圖  
 茲游愜心目浩蕩滌塵拘何當餌靈液一霍跨天都  
 本色住山人尋山苦不早扁舟海上來訪雪黃山道  
 黃山固未識雲氣眼已繚石壁飾竹光圓沙宿寒鴉  
 客子恒苦饑舌妙神理飽茲因良可託結茅成二老  
 送更生游黃海還吳淞二首  
 攝山秋色囊携滿更領湖光十二分試就天都峯上  
 望好將雙袖納行雲  
 芒鞋踏破真行脚山水隨緣亦納僧忽從佳句徵名  
 理龐老今生是右丞

夢遊黃山記

汪重昌曰是月九日薛更生從黃海歸冒雨見訪縱  
 談人生浮沉窮達之狀相與微笑因誇天都奇絕處  
 予茫無以應唯首肯而已飯罷詣髯公齋集若淵子  
 旭及其郎君清酌溪樓淒雨涼風覺半臂可加更生  
 復云始入山值雪雪霽攀躋遠峰靈岫與六花互相  
 映帶個中但覺和煦寒意為回每晨坐夕寐輒哆口  
 不置仍冒雨別去予不禁心癢顧塵緣俗况難與排  
 決又不盡在浮沉窮達中豈予形穢自使山靈杜絕  
 耶越廿四日朝起櫛沐甫畢子晉從溪南來寒色侵



面呼童子覓茶少許曰飲此致和氣也予因向子晉云恨今日不黃山且更生在華亭又不知視此何如是日應酬頗惡但風迴雪篆差可與語已而子晉別去取酒三升獨酌遂成寐自立巖壑中子晉若淵以次至携有麗人予微詢子晉云是趙家又有一人疑是鹿長又似予姪子開然不甚了了也共緩步漸入佳境每逢孤峭予必賈勇先登而子晉低迴凝視若憐惜彼美之意雖夢魂中大有開豁或立石萬仞或峻險無端或霏霏微微仰視雲表或浩浩澹澹俯瞰清流仙仙乎偉觀不圖至於斯也然獨不見有草木

竝不知爲何處似復問子晉乃云卽黃山此時半已驚覺以爲可以應更生之誇也起步樓上日已當午則向之彤雲雨花別成晴色矣噫更生以入山日雪雪晴而遊變幻猶在數日中予雪而寐寐而入山醒而晴僅移晷耳日者子晉曾爲予言趙喜鶯清冷饒韻致予實未得一見不謂卽偕子晉追逐夢中爲點綴片餉勝緣而子晉又能從夢中指我洞天本色第疑蒼松異卉何獨不與靈石層巒一切發現或者留此以俟身到耳若曰此幻也非真也向癡人說夢予又不大多事乎子晉又語予按槐里縣亦有黃山而



極西亦復有黃山予讀山海經有錢來山又西百八  
十里曰黃山無草木云乙卯仲冬記

山史云余夢游名山奇絕并無草木以為其骨力  
者當如此耳趙喜鶯者子晉所品題人也以數日  
間絕命豈魂託子晉以游于小華中耶百孫未入  
溫柔鄉乃從步幄中彷彿姍姍其來遲亦足快矣  
余以為人趣所感新鬼身能靈而

吳與曜云百孫為余言夢遊黃山事余已同趙生喜  
鶯合掌謝承携矣夢中之景何必非真百孫其無負

更生哉按莊伯微以意想作仙道每日入向西北閉  
目握固夢遊崑崙者三十年嗣後得金液方竟自飛  
去以余聞黃山多金鼎丹丘春秋之交玄鹿白猿謔  
雲端而奕松際遊者時一見焉意其間多異人非有  
道者不遇此百孫倘遇之歟抑遇之而不欲言歟余  
病瘠力微雪窻饑坐自成僻疾擬以明年三月全百  
孫杖履其巔長卿雖倦遊于今可再鼓也友人向余  
言邇來好事者少動籍口右軍婚嫁未畢之語如百  
孫之能夢者蓋亦無幾矣

山史云喜鶯仙游矣為我謝子晉此非吹簫侶耶



未可與携也 山勢突為非携子晉地共穴 趙喜鶯非託子晉知已安得入百孫夢又安  
 言得列名黃海中余所為紀亦以此子生平有勝緣  
 了此一念倘百孫欲做柳夢梅故事當覓小像喚  
 之定作睨睨音相應耳 曹時可云世盡夢也百孫獨以黃山為之夢夢而為  
 之記將毋夢亦有註脚耶是不然百孫蓋以黃山一  
 夢破人世無量無數百千夢界者也更生子晉能舉  
 黃山於口而百孫乃發黃山于夢夢者夢說者亦夢  
 邯鄲之夢也醒世間名利軒睡之場華胥之夢也舉  
 人世物我山高之相盡覺而醒之故余讀百孫夢黃  
 山記覺宗少文之卧遊猶夢焉而未醒者耳百孫信  
 得及否倘信不及請持坡仙睡鄉記與夢黃山記印  
 之天都主人他日兩脚踏翻黃海則又付之他日夢  
 界矣

和詩

許文華

字茂先歙人

和汪百孫夢登黃海

夢入烟霞裡微茫接海天奇峯擁萬疊怪石出層巔  
 神使遺瓊液仙妃授玉篇覺來心自爽長嘯轉悠然



曹跋  
萬曆乙卯

張渤 字若侯華亭人同前題

一枕翻成蝶夢翩忽經三十六峯巔  
鬚眉映雪寒光薄衣帶流雲冷翠鮮  
疊石想為燒藥地逢人莫是爛柯仙  
不知何處飛瓊侶吹落鸞笙響瀑泉

游黃山詩

徐時進 字元脩江陰人丙辰六月至山

豐溪曉行遇雨

早發豐溪道崇朝雨未收  
暗雲晨欲暮爽氣暑疑秋  
屐踏千崖濕桴乘萬壑流  
天都看杳靄取次足窮幽  
讀景升黃海游紀昔火為  
半生臥榻風塵黃帝龍飛去  
鼎湖千秋遺蹟總模糊  
誰來黃海編青史  
會有名山託董狐

奇峰六六絕風塵山史評  
來處處新江上有山堪入  
史欲憑濡筆問春申



虎頭巖微夢

六月間關襍穢游芒屨踏遍萬山幽夜來夢虎天都  
道今日先登是虎頭

浴湯池

靈液何來湜湜通常温不借火為功半生浪跡風塵  
色到此渾消一浴中

早發豐文殊院阻雨

稽首文殊頂峯高暑氣微怪風千谷吼怒雨半龕飛  
傍佛圍鑪火從僧借衲衣喜饒山秀色餐此足忘飢

食苦菜

老僧朝作供采苦山之麓為問來遊者幾是清人腹

登蓮花峯絕頂喜見佛光

直上蓮峯忘路難蓮花片片佛光蟠六塵洗去千巖  
淨七寶騰來五色團葱鬱豈同佳氣望輪囷寧比卿  
雲看應憐俗子無明覆為現神通作正觀

海子

一片空明萬里光疑雲疑水總茫茫大悲頂上憑虛  
聽聽得潮音散下方

坐平天砭松頂

老松高尺餘虬枝覆盈壑我來趺其顛忽疑身是鶴



鍊丹臺  
容成藥鼎閉難開  
帝子龍髯去不來  
一自蓮峯依寶  
相丹臺今已作蓮臺

青鸞峯

亦名天女

峯崒天都雲外看  
旁臨天女是青鸞  
奮飛欲向天都  
上好問青鸞借羽翰

九龍潭道上喜值一乘上人因而問路

問偈尋師鏤半龕  
忽逢歸錫九龍潭  
正從羊鹿驚相  
逐喜得牛車作指南

潘之恒

立秋後一日喜徐元脩同家侄肖先游黃山

回贈詩四首

有序

元脩徐丈以伏日將游黃山惟余勸駕天作淫雨  
不害于游更從絕頂五見佛光咄咄堪如家侄肖  
先實從行能向余歷道所希覲元修方自清涼界  
來應念余熱惱場中不易解脫也詩以志喜并志  
愧末章兼呈朱白民張韋玉黃介子錫余四丈  
清宵載酒豐溪上月色分輝送子行陸海片雲頻聚  
散靈山長日半陰晴光因按指輪俱轉法為觀心幻



屢生老去未償招隱志何年五嶽著書成  
 黃山無月不堪游逃暑經旬直到秋雷雨深盤千澗  
 庖雲霞幻出萬峯頭松成佳韻差能和石作餘糧尚  
 可休彩筆莫驚龍卧起怪來五色瑞光浮  
 萬里消搖誰適主東南名勝逋為賓不須方外憐多  
 病共向光中見一身依隱清都如故舊游閒濁世豈  
 沉淪振衣但覺江波遠挽得天河水洗塵  
 朱張傾盖游同歲選石摩崖共勒文未信洞庭能鼎  
 立曾將華嶽與平分佛光暫攝慚無著世路多岐陋  
 有聞我欲臨風招二仲此山元是屬黃君

黃海 卷第

黃海 卷第  
 天都山史潘之恒景升輯

紀游四之  
 校

獨游  
 叙曰戴虞部之游歷歲方半而陟名山者五且以

黃海殿焉虞部生四明固佛仙窟宅雁宕天台杖  
 屨間可俯拾而得之似太晚其峯巒潭瀑直與胷  
 中丘壑爭奇既而登兩天目峭矗澄空雖不侔於  
 粵攬雲一片足當羣玉琲珠愈遠愈奇則新安尤



山水與區然輜軒經三邑曾不可信宿留禮白嶽  
 畢即搜靈巖洞有四遊其三將買餘勇于黃海咨  
 不慧以祈嚮一過兼葭館定盟不慧曩稱山靈蹇  
 脩于虞部若有忝色徒謂造化善闕尤忌舉全雖  
 虞部安能自必言未既而飈車已及雲門不旬日  
 而窮海子門人二戴見弼時實從余迎之芳村尋  
 馱中容成臺之蹟而後息趺舊館共得記一首詩  
 若干首所稱獨游草其說在魯國多儒一人耳庖  
 丁九解無全牛遊五臺是我同流惟公榮可不與  
 黃飲酒善游者當自得之

詳在虞部游集

黃山游紀

四明戴澳曰余入新安登白嶽恨其峯理皆橫累不  
 能刺空峭出且去人境近望中直逼村市少幽窈之  
 致蓋余從台雁兩目來難為山矣顧從天門望黃山  
 亂峯葉葉立雲際覺靈鬱之氣從石竇飛來咤賞久  
 之心目俱往忽不知身在天門也嘗讀黃海矣猶謂  
 是筆端丘壑耳嘗耳之方外矣猶謂是舌端丘壑耳  
 至是峯峯俱活顧不能奮飛遙結異日盟而去及余  
 買舟屯溪且將解維而潘君景升移書招會遂輟行  
 以八月二十六日訪景升兼葭館景升以文事羈至



九月初二日乃先命其少子爾肩偕行約以初六日  
追赴先是嘗招沱川余子餘而辭以事幸戴賓實從  
浙嶺來戴元震從玉山來且遲我久矣至是俱發皆  
自以爲探竒前茅風日澄爽筍輿有繹行皆緣溪溪  
上皆好山山合溪濶則徑以嶺度嶺復緣溪凡三度  
嶺至山口暝烟起矣遂止一小菴方欲散步溪上菴  
僧告以防虎未昏闔外戶私念賓賓獨先度嶺不知  
宿何處明發度石碓嶺初日與宿靄相蕩覺林篁間  
別一色界再踰嶺雲門諸峯屢出沒截浮溪踰陂陀  
卽抵湯口見賓實飯山店令元震遲與俱來折而左

羣峯簇迎反不見雲門溪勢峻瀉潺潺作迸玉聲或  
灑崖縫間如白龍分道而下溪多巨石色皆藍時有  
澄瀦沙可粒數余非陶隱居殊盤桓不能已已至湯  
寺少憩將浴湯泉沾酒壯之出寺度木橋至泉所泉  
徑丈許廣半之石亭覆焉前隄以石可隱身解衣試  
之初似太熱頃乃相空泉脉絲絲從沙底起坐沙如  
茵深處僅沒頸遺垢卽瀉就溪其合溪處兩指間分  
炎涼以次出浴坐溪石上寺僧供茶賓實曰驪山温  
泉說者謂爲太真所辱則此泉隱萬山間適以全其  
清淨耳余曰樵夫牧豎未必便爲此泉榮倘令分得



華清遺粉終是山史一段佳話也因大笑將上慈光寺而寺僧卽心潤菴滄茗來迎乃偕往百折至山門門內一清池梁而度寺方草創正倚天都峰至則返照峰頂便似放金色光耳諸峰或當天都肩或當臂參差若侍夜卧聽煉魔諸堂梵聲互作直至夜分次早爲先慈脩識午後將尋白龍潭諸勝賓實以先去弗偕爾肩已歷諸勝返則挾之復往卽心洞居兩上人俱各芒屨策杖出寺里許折而右達溪梯石下是爲釣臺俯瞰白龍潭澄碧照膽久之毛髮立復梯石上渡溪行半里澗石徑廣丈餘方坎如鑿仰受上

流水色似白龍潭淡半之是爲藥鈿鈿左欹出水水作縣溜承溜一石窟口如甕深不見底指爲丹井或曰龍實棲此水走石坎滑淨蜿蜒疑是游龍靈蹟折而右捫蘿登蓮華菴仰見蓮華峯斗插天都右嵐骨雲稜陣天匝目覺慈光所見猶爲偏局耳出菴折而右復就下流視白龍潭見潭底方石丈許纂以白沙水湫風走恍覺靈物隱躍其中久之寒慄乃登岸行亂石雜樹間石或覆或夾或累或欹樹多桃想華泛時當更勝再浴湯泉遂道羅漢級而返級夾兩峭澗水盛時可當瀑布至寺晡矣賓實自湯嶺揆鳴絃澗



觀仙橋先返是夜施食煉魔前後相應梵唄鈴鐸響振林巒亦一淨觀也夜來雲甚黑謂當坐雨子夜起大風仍朗霽凌晨起洞居月溪兩上人爲鄉道出寺左折行可三里路右一峯高數丈酷肖螭螯余卽以名之折而上至觀音崖數十折至石人峯月溪先登余猱攀而上見二石立如人地不餘丈而下臨百仞余恐急下且止繼至者右折二里一峯斗絕元震先陟其巔月溪且結趺松頂余賈勇上同採雲霧草以下草生松杪如亂絲蓋飽雲霧而生者惟此與石人峯有之折而上至嶺頭左望文殊院踰嶺直下則爲

蓮華洞自背慈光寺路出天都右盤磊石間上蔭雜樹旁遵幽溪時見古松亂簪峭壁不着寸土而翠色欲流且蚶蚪萬狀此不可解先往蓮華洞葛溪石爲路余時倦甚獨扶童子後至卽卧閣下謂晚當宿此卧食頃稍振躋攀之興又勃勃動矣先是洞中矮僧兩以茶迎于路上下如飛余笑曰此必獼猴化身也洞不甚竒其在黃山尤不必以此見竒乃復上嶺則霧作且大風折而右行石縫間上股慄坡余初不知也已過見後人皆匍伏至余始窺而駭之稍入夾崖如墻再入爲天門穿石出賓實先過股慄坡悸甚至



是尚失色倚古松松臥崖上根附石長數丈右折復左崖壁立路僅容武崖斷梁一枯株余時念賓實至此不知當作何狀令二人候之余前復坐則元震爾肩大叫稱奇余躡磴上阻一陰洞似無路轉入梯木穴石而升乃復得路此一大奇也至院衣裳盡濕鬚鬢皆如貫珠霧重如此亦所未見因知古松長崖石間而蒼苑反倍他山者蓋十日九霧其潤澤淡也是夜竟雨次日大雨斗室盡黑秉燭作詩以消剩晷至夜半北風送寒雨聲斷矣侵晨躍起羣峯忽現登夢象臺望九日光含雲海而天都東面先已隱隱受之

次及蓮華諸峰宛若紅苞漸放各大叫絕倒恨鬚翁不至少一絕妙品題也已復從院後左折捫壁宛委而上得一方丈地古松爲蓋樛枝可憑天都蓮華片石皆顯下瞰諸峰如几案間物因大叫曰觀止矣發願當建飛閣于此而以觀止顏之乃從右下路亦如左天所設也飯畢復道股慄坡折而右度一短岑見百步雲梯在懸崖間色甚沮俄至則躍而上一再息至巔不自意輕捷乃爾右折則登蓮華峰或行鰲背或穿蜂房或陟鼠梯或凌雲脅頂且近小菴嵌崖縫間棲一衲各跌嚙茗已乃爭登絕頂余以風急且阻



一歛崖遂止而爾肩元震已超逸去然亦竟怯木梯未盡二級而返賓實固欲上迨一試之而吐舌以下余所止處已似俯瞰天都但不能窮遠目耳返就菴飯胡餅而下洞居云速行過一線天恐風作不得過也既過亦不覺險蓋畧如百步雲梯而兩旁傾峻耳折而右見清泉一泓溝石而下口就嚙之清甘不減帀跑右折而上則一菴奉大悲像在蓮華峰大悲頂之間至此石皆肥頑少森秀之觀矣僧智真索庵額余顏之曰辦蓮居以其隣蓮華峰也出菴數折路右一石如舡再折有海螺峰插路左上爲石門過石門

山皆冒土又少蒼松丹樹點綴其間折而右踰嶺度前海當海下流者爲煉丹臺亦不甚峭惟遙望翠微亂峰刺眼不啻冰鬚倒植也由是登光明頂可昇而上獨東北臨絕壑至頂豁然開朗大鄣九華匡廬天目及城邑村塢皆歷歷可指所不得于蓮華峰者已得之此矣余戀賞不能去因嘆曰是真光明世界也折而下則爲招隱庵禪僧智空所棲俯後海飛來峰三海門皆承趺坐獨計所稱前後海兩山窪耳無杯水之儲如以雲海名則趾又狹甚受雲不多余意隄其下流蓄水可各數十頃今諸峰倒影其中增勝甚



多而費復不侈惜無好事者耳由招隱庵右折踰一  
崗折左則獅子林至此山益荒寂徒爲石筍砭作郵  
傳耳次蚤登十信峯梁淨土門遙觀石筍林立拂日  
梢雲余顧笑曰石筍如許今爲石竹定當直覆帝座  
耳各大噓去由獅子林折而左卽入深箐履巉石路  
僅如線武不得展左危崖右邃壑一峯聳壑中東南  
邁軸可高下結廬而西北如削面一峯突起孤峭上  
有兩石人形一坐一立冠服儼然余標爲仙門峰軒  
轅丹室定當在此且下臨清澗白石磊磊自登山不  
聞水聲至此耳想始活數里至白沙砭醫茗僧舍右

折里許爲白沙嶺經雨沙疑不復鬆滑人謂最險者  
我輩皆易之嶺盡則丞相原矣回視岡巒萬叠不借  
文蕭之騎而飛陟以來豈容成浮丘實呵翼之耶原  
頗平廣天宇亦開是爲擲鉢禪院佛廬精繕清溪夾  
門溪中一巨石可亭下可流觴夜來得月多坐石看  
月冉冉沒峯頂忽如蛾眉而清光猶滿東嶺次日重  
九元震笑謂人方登高茲乃出山恐孟嘉笑人余曰  
卽出山猶可俯瞰城市登高者乃相與大笑而去山  
廻溪轉則九龍潭纍纍崖壑間杉松映之圓坎澄碧  
高下遞注時成瀑流此正黃山所少者恨無路可逼



視耳迤邐至湯口賓實先俟我酒家數巡謂爾肩曰  
尊君此日當何處登高荅曰雅以烏石爲龍山計此  
山猶不得望湯口酒樓也余因戲作詩東之微醺就  
路洞居辭去月溪蚤從文殊院歸寺至江村則與賓  
實分歧傾倒累旬道路爲別相視黯然過芳村遙見  
髯而肩輿者驚喜曰景升至耶輿交果然各躍下車  
把袂相勞因笑謂方意君界就烏石大屈大屈景升  
欲重入山遍搜諸勝余辭已遠無還理遂相與尋兩  
崖勝處而返問水晶菴黃葉自飛白雲不掃薌石絡  
藤蘿間塞蘿則汪司馬遺蹟在焉度石礎見嶺下溪

許園亭脩然指問景升則曰此爲饒中汪司馬故所  
逍遙處也暮弗及往明日元震爾肩以覓肩輿不得  
先步去余獨與景升往游筍輿軋軋度石堤登韋堂  
蠨蛸在戶望樛木亭翳冷烟中登凌風閣司馬詩若  
記猶存饒中雖不爲司馬有而人之識饒中猶以司  
馬也東山自謝蘭亭自王千載而下竟誰代之故可  
無舊苑荒臺之感旋返追前侶及之容溪溪以容成  
得名橋曰容成橋橋西北麓卽容成臺趾圓如甃三  
面環水一脉連山土人相傳謂之仙臺蓋容成燒丹  
處也地亦清孤去容溪數里爲楊干寺寺臨石澗面



豐山寺僧亦解煮茶固一卷游化城也過佛子嶺出  
潛川未至巖鎮三里為清泉寺寺逼市喧絕無諸峰  
兩海之意矣遂直抵蒹葭館夜來清夢猶在天都絕

頂

詩附錄

戴澳

字有斐癸丑進士官工部虞衡司主事

訪潘景升蒹葭館賦贈

幾年夢到蒹葭館今日經過似舊游玄契早因詞賦  
令澹懷更為水雲留風生竹里寒聲晚月印花溪素  
秋仙籙許編吾與爾好同黃海訪浮丘

黃山道中三首

悠悠入山路轉轉遵清溪地僻人非遠秋淡葉未稀

雲門時隱見磴道數高低谷口逢雙衲言來湯

寺西

澄水出秋色疎林遠俗氛巖居低隱竹水碓冷春雲

峰合路疑斷洲高溪漸分無人領幽意木石自

為君

茅屋參差出柴門清靜開布橋因澗石引水截雲隈

荳項黃連秣漁磯綠繡苔隱心茲已愜况復陟丹臺

霧中登文殊院

疾風吹霧霧不開危崖線路撥霧來羣峰咫尺藏面  
目千仞冥迷空崔嵬路窮生路緣崖轉崖峭霧深路



難辨忽梁斷壁學蟻度忽梯陰洞奪猱趺險盡逢僧  
心始安鬚眉濕霧笑相看翻思險絕是奇絕還期去  
日細盤桓  
文殊院曉霽懷景升  
昨夜夜半吼北風羣峰欲搖宿霧空海日先射天都  
頂蓮華蓮蕊漸着紅古松青青雜丹樹遠峰箇箇送  
寒翠十分秋色洗來新都向祇林供師利欲驅師利  
綠髮獅急載髯翁來此時諸峰霽景繪不出代繪須  
君一幅詩

登蓮華峰

捫崖巧盤折此路便堪仙本擬窮華藏翻如入洞天  
半龕危倚石老衲獨棲禪再躡層梯去眞登上品蓮

登光明頂

欲盡羣山勝無如立此峰三鄣應長嘯九子接疎鐘  
爽帶匡廬瀑青來天目松秣陵多古意烟際簇芙蓉

望天都峯贈潘爾肩

奇峯三十六獨此峭且尊萃嶽烟霞宅玲瓏日月門  
祇應承帝座不復隸坤元君是飛仙侶凌風試一捫

丞相原看月

時重九前一日

天到古原濶月臨空谷多就盈昏正午已忌滿半初磨



蒼岫隣寒闕澄溪妬澹河來宵醉佳節何處酹仙娥  
九日出山次湯口戲柬景升

連日天都峰上坐偏當九日到人間人間尚是天都

麓猶勝登高烏石山山近巖鎮景升故所登高處

芳村喜逢景升

遲君日倩嶺雲催一箇峰頭望幾回短屐已辭丹壑  
返仙筇方指翠微來相逢是處尋山水對坐搜詩佐  
酒杯畢竟天都君是主棲霞舊侶莫相猜

薌石

誰上蓮華峰手把蓮葉摘擲此清澗邊更名曰薌石

歲久風霜多薌老石看坼石上倩古藤絡此一片碧  
古藤若解石欲飛還向蓮華峰頂歸

同景升遊硤中

石礎嶺上經還往兩瞰園林水上開試問幾人游世  
外曾經司馬卧雲堆公垂大業兼詞賦我炙高名在  
草萊舊隱于今誰是主新知更覺首堪回筍輿競發  
凌山口筇杖重扶入水隈鳥徑線通衝宿靄象堤弦  
引護秋苔粼粼澗石萍蹤聚翼翼溪濬隴望每山色  
蒼涼園別墅秋容澹漠出荒峽林泉似到樊川上樓  
閣疑分杜曲來魚老寒塘存繡尾夢殘春艸剩枯荑



石牀蘇活重陽雨野鼠踪淡木壁灰墨蹟猶鮮沉筆  
 塚文心長談讀書臺山陽故好惟餘向摩詰追從僅  
 有裴陵谷不遷公不朽西風猿嘯為誰哀  
 靈液縈為帶神砂甃作根松杉通海路煙火隔橋村  
 仙鼎終難問荒臺喜共捫境沉山實淺祕剖地逾尊  
 欲盡天都奧先須此叩關

黃海

天都山史潘之恒景升輯  
 舟隱丈人吳 著何有校

紀游四之

寒游

敘曰吾得朗倩于神游則默孫先之洞視無礙若  
 白民每以益氣規我從朗倩申之衆以寒施而我  
 以寒受暢然怡悅無少遜卻則謂朗倩之行徒僕  
 三人何從之多朗倩之紀纍纍三言何辭之煩而  
 若未盡也語余曰吾持千里糧不支一宿攬萬峯



秀不盈一瞬與億兆人遇未始有人歸以旬日若  
歷終古而紀以三言若無言也則以相得滿意仙  
仙乎歸矣倘非值子之寒得無鬱蒸其旅况耶于  
是倒瓶出空尚費幾鄰虛合成鄰虛爲供吾不忍  
作送寒言別而以餘寒留之朗倩行耶留耶不行  
爲主不留爲客吾與朗倩兩忘之惟作報兩君腹  
我以臞勝白民之益我以氣矣兩君聞之將寒其  
齒乎

吳趨沈顛自序云世不作歲寒游而習艷游不知歲  
寒則山骨露奇林容奏怪一種蕭幽淡寂之味莫備

于此而世棄之予獨取之以故入山以來經年不出  
而驟千里焚筆之後一字不立而忽綴三言遂令黃  
白笑人不覺自笑三言之作中原染指天都擅妙嗣  
後英雄長語爭來欺人疇復習之而習于此游則亦  
世棄而獨取也道人拙矣朗道人呵筆題

紀寒游三言

月之辜葦南發沙雨欹渚雲潑人參影怯寒涉馮封  
姨雙舫脫練采石補天缺且復雨松陵墟驚來颺  
飛吾廬霰作花膠籬篠眉梁出鸞水餘囊炊煙溪稍  
西桑扉深茗有漁婉相勞情堪書曲瓢露短甌菽



人坦坦味不俗明日行臨浦囑當入林梅已粟溪  
復溪爰有邨值桐君笑候門出廣長覆慧根一宿去  
兩無痕刺沙棠沿水脈割前谿鷗半席宿沙影分  
月白覺鳥翻魚雅擲霧耶雲夢魂濕登崇期市如  
織踞堯子隨南翼青嶙峋染衣裊乾木奇間鉄壁倩  
秃管關仝勒璇煙生金鳥匿鷄喔喔馬踽踽銜有  
麋磨有菽月絳戶霜衣轂續殘夢驚落木寒霏凝山  
意肅鳥嬉林光始旭五里墟一飛水石疑雲松作  
雨雯曠之境昭洗酌泰熹狎元始雲中君或遣止  
嵐如醉樹如寐月銷痕霜乃綴袒我襟行其際稍通

樵厖也吠矚天日揭地肺峯展立借雲勢蘿溪回冷  
亡味乍予移幽睇盍寫之無聲句南宮皴北苑  
神翠甫折光搖春香賸交繡阪陳徒芊術抹寒榛陡  
躡陞雲根伸鳥衝車麕嘯人轉陝阻梁其濱翠微署  
雲水津白板去青旆迎臨印肆何樓儉鈇規聚帶鬻  
并尋嵐姿譜我征寒冥冥氣楚楚陰厓開奮于虎  
循厥趺按鬼斧冰截髭霜沁腑呼山君夏雲母碧垂  
東青避左參琳宮憩紫府壑日欹礪霞吐淡相值樵  
之父影傴僂笑言儻憑鳥使邀鹿園夢栩覺髭徐  
掀咄英雄雨打風一番事掉虛空車生耳月離弓十



可翁夢兮醒三毒牀五欲枕真覺邊蓮華冷 捫壁  
三陟嶺五箬竹間創予覩翠拔地森可數排作屏蹴  
成堵拈爲華紺百朶中呀然礪莫肩紋競出詭且古  
乞壺公縮吾土 五日行澄無雲澗以外寒不聞破  
蕭陽衍石坪蘚光波擊水精微噴雪禽爲驚蘆花衲  
栗葉簷縈虛碧掬空青挾玖鏡嚙石稜凡幾家寒相  
凭際以曠蒼然冥幻入繪安可名誰貼予問太清  
鼯乘霧公無度安知奇此回互宛塗鴉礙刷素俄迷  
離釀沈暮得鳥聲失驢步天解願還爾故巒螭翔虓  
嶼赴羣平皋緣野渡况升沉牽回顧雲倒生天門路

光毼毼氣霽霽襲霞起貫月深含水晰蒙石陰爲  
綏綬爲鼎鬻莫之擬終當尋 山脈寫迸寒玉爭瀟  
噴層洄湫猶狂龍非我伏放錫去投深麓鳥爲家雲  
可族 功德水阿耨池非彼國云誰思值湯泉心悄  
焉覓蓮房溯藕根一指際分涼溫發靈幻儲精元易  
肌髓澆心魂本無垢滌者煩 度虛影參慈光頻伽  
笑杜嚙香跟金繩躋鴈堂僧面月佛頭霜冷踏蹻心  
且狂猊可策輕八荒 攝白龍潭已空參此際了無  
蹤溜逼下巧搏風天失解鬼無工設藥鉞盛鴻濛山  
莞笑光成虹冉冉去來掌中 徙百折解行穴倩石



人輔我蹶嗅雲霧

草名產此

翠攬纈何年松劈古鐵蹠

中開秀逾泄劃然楞激若謫鳥遜道猿爭巢雲之西

黯于宵憩蓮洞訝石標殷其雷在山椒間以雪紛蕭

蕭乍寒燠遞昏朝秦帝座為解嘲啟山脣捫石脊

辨晦明僅咫尺足須累瞬莫息扳倒景跣危壁曳鼠

梯隙蟻垤俯九子羅吾膝招五老笑啞啞居蓮花

出世緣怪兩趾膠其顛衝雪籟著風鞭斲石筍拖雲

煎餉黃老匪素餐試締予平生歡僧巢居粘怪壁

諷襍花掃白石作麼生豎此拂咨軒皇溺黃白欲

喚醒成今昔心明界無人識吾入林獅子出登十信

須驀直淨土門總此級忍上中苦難涉此黃老土

中物胡帶人難解脫日不然止啼錢開喜根微有權

華嚴界黃海編人不游名可憐前言戲何有焉聊舉

似兩髯仙

景升白民









